

AKASHVANI AIZAWL

REGIONAL NEWS BULLETIN

HEADLINES (EVENING)

- 1. Chief Minister Pu Lalduhoma’n Anti-Corruption Bureau (ACB), Mizoram Annual Report hmasaber 2025-26 vawiin khan a tlangzarh.
- 2. Information & Public Relations Minister Pu B Lalchhanzova chuan Media te chu sawrkar policy leh scheme hrang hrang Mizo tawnga lehlin te tilang tam turin a chah.
- 3. Prime Minister Narendra Modia leh Japan Prime Minister Sanae Takaichi te chuan vawiin khan Annual Summit ah India leh Japan inkara thawhdunna hrang hrang an sawidun.
- 4. Union Minister for Rural Development Shivraj Singh Chouhan chuan VB-G RAM G chuan hna thar siamin, thingtlang khawsak a tihchangtlun bakah hmasawnna tam tak a thlen dawn a ti.

<><><>

ACB ANNUAL REPORT

Chief Minister Pu Lalduhoma’n Anti-Corruption Bureau (ACB), Mizoram Annual Report hmasaber 2025-26 vawiin khan a tlangzarh.

Chief Minister chuan, he Annual Report hian sorkar hnathawkten rinawm leh dik taka an mawhphurhna an hlen a pawimawh zia te, sum leh pai enkawlnaah dik taka thil tih a tulzia te a hriih thar dawn a ni a ti a. Corruption hi rorelna tha siamna daltu leh ram hmasawnna tichhetu a ni a. Corruption do hi agency pakhat mawhphurhna chauh ni lovin, mipui zawng zawng leh sawrkar hnathawk zawng zawngte mawhphurhna a ni zawk tih kan hriat tlan a ngai, a ti. Hlemhletna do tura hmalakna chak tak neih a tul avangin sorkar chuan ACB leh Mizoram Lokayukta te chu a thuamchak a. A thawktute pawh lo intuaihriam zel turin an beisei a ni, a ti.

Kum 2025-2026 chhung khan ACB Mizoram chuan eirukna kaihnawihah Complaint chi hrang hrang 17 a dawng a. Chung zinga 15 ah te chuan Preliminary Enquiry neiin regular case 6 a ziaklut a. Kum 2025-2026 chhung khan Preliminary Enquiry hrim hrim hi, kum hmasa lama mite pawh telin 14 an ti zo a, Regular Case 7 an chingfel hman a. Kum 16 chhung 2010-2026 khan ACB Mizoramin Corruption Case chi hrang hrang 35-a Chargesheet atangin corruption-a inhnawih mi 112 lai chu Special Court, PC Act chuan thiamloh chantirin hremna a pe a ni.



MISTIC

Mizoram Science, Technology & Innovation (MISTIC), leh National Innovation Foundation (NIF) tangkawp chuan Innovation Facility Centre (IFC), MINECO-ah tualchhung Zopa tualchher thiamte khawl siamte sem a, hei hi an sem tum thumna a ni.

Tun tumah hian beneficiary 30 te hnenah khawl semchhuah niin, zopa tualchher thiam in an siam an ni a, Ramdinmawia (Haulawng) in – Hmarcha chi leh a kawr thliarna a siam te, Lalhruaitluanga (Serchhip) in- Changel channa a siam te, Lalbiakzuala Ralte (Luangmual) in - Kuhva kawrpui leh a thel faina a siam leh Lalthafela(Kawnpui) in- Kuhva thelfaina te a ni.

Heng khawlte hi a thlawna dawn ni mahse a hmangtu turte leh NIF/MISTIC ten inremna ziakin an khawl dawn hi tangkai taka hmanga, a hun taka review/feedback pe tura intiamkamna siam a ni.

VC

Mizoram-ah hian Zopa tualchher thiam (Grassroot innovator) te hi mi 50 chuang awmin, anni hian an hmanraw hmuhtheih leh tualchhung mamawh milin mipuite harsatna eng emaw zat an lo sutkiansak thin tawh a, MISTIC hian Innovation Facility Centre leh Patent Information Centre kal tlangin Innovation lamah hian hma nasa taka lain NITI Aayog 2025 Report-ah hialte pawh IFC hi a lo lang ve tawh a ni.

NIF hi Sorkar laipui Department of Science and Technology hnuaia autonomous institution niin Innovation-in hma a sawn theihna tura ram pum huapa hma la tu a ni a. MISTIC hi Mizoram sawrkar hnuaia Science, Technology leh Innovation lamin hma a sawn theihna tur Central rawtna anga Mizoram sawrkarin a din a ni bawk.



IMPCC

Information & Public Relations Minister Pu B Lalchhanzova chuan Media te chu sawrkar policy leh scheme hrang hrang Mizo tawnga lehlin te tilang tam turin a chah.

Vawiina I&PR Conference Hall, Lianchhiari Run-a Inter-Media Publicity Coordination Committee (IMPCC) Meeting a hmanpuina-ah a sawi a, tunlaiah information a darh chak tawh em avangin information diklo laka inven nan thawhona mumal tak neih a pawimawh a; chuvangin, IMPCC chu sawrkar laipui leh state sawrkar te nena thawkhoin, mipuite hnena thu dik tak pek chhuah kawngah an pawimawh thu a sawi a ni.

Minister chuan saptawnga thu chhuah thin media te chu Mizoram tourism than nasatzia tarlang tam turin a chah a. Aizawl khawpui chu traffic dan ngai pawimawh thin khawpui a nihna te, honking free leh Silent City a nihna te, khualzin hmeichhia te tana hmun him ber pawl a nihna te tarlang tam turin a chah a.

Thenzawl Peace City-a golf course leh ropeway project vaibelchhe 36 man tura duan mek te chu India ram pumpui tan thu lawmawm a nih thu a sawi.

(BYTE)

DDK (News) Mizoram Director leh IMPCC Chairman ni bawk Pu Nampibou Miranmai pawhin thu sawiin IMPCC chu media te leh sawrkar department hrang hrangte thawhona platform pawimawh tak a ni a, IMPCC hmang hian mipuite hnena thu thar sem chhuah kawngah media hrang hrangte chu thawhhona tha an neih ngei theih a beisei thu a sawi.

(BYTE)

Vawiin meeting-ah hian Mizo tawng bakah English leh Hindi-a thu chhuah tam te, Mizote GST lam inhrilhriat tam te, ruih theih thil thatlohna hawi zawng information pek chhuah tam te uar a tul thu sawiho a ni.

<><><>

YOUNG CHAKMA ASSN OPEN LETTER

Young Chakma Association, Mizoram Chakma Students' Union leh Chakma Mahila Samiti te chuan Chakma Autonomous Dist Council member -MDC te chu Dist Council-ah mipui rorelna, kalphung nghet leh Dan pui hlutna vawng nung tura ngenna an thlen.

Chakma khawtlang pawl aiawh an nihna angin tun leh nakin lawka thangtharte hamthatna tura CADC-in a zahawmna, rinawmna leh dan hmanga an hmathlir humhalh tura an mawhphurhna hlen chhuak turin an ngen a. Mipuiin beiseina sang tak an neih laiin, tun dinhmunah chuan vantlang rawngbawlina chu mimal, chhungkua leh pawl hrang hrangte duh dan zawngin a kal mek a, Politics in mipui tana rawngbawl tawh lovin mimal hlawkna hmanrua ah a chang tawh an ti a. Hna lak-ah te, regular recruitment ah pawh chhungte, thiante leh politics lama an duhsakte lain, a tling leh thiam zawk te thlauhthlak thin an nih thu an sawi bawk a ni.

CADC chhunga rorelna inthlak reng thin chuan rorelna nghet leh rorelna tha a tikhawtlai tih an sawi bawk a, heng politics lama buaina chhuak nawn fote hian inthlanna thianghlimna a tichhia a, CADC dinna hnuaia constitutional spirit leh thil tumte a tichhia a, Sorkar inthlak danglamna hian inawpna a tibuai a, hmasawmna atana hmalakna a tikhawtlai a, institutional governance a tichak lo bawk tih an sawi a ni.

Hei hian India Constitution Sixth Schedule hnuaia langtlang sorkar, rinngam leh Dan hnuaia rorelna dik lungphum a tichak lo hle an ti a ni. India Danpui Sixth Schedule-a constitutional principle awmte chu vawng nung a, Chakma Autonomous District Council zahawmna, rintlakna leh rorelna dik humhalh tlat turin an chah a ni..

<><><>

ACCIDENT

Nizan zanlai pelh hnu dar 2 vel khan Kolasib Venglai East Silchar Road-ah Aizawl lam pana tlan Wagon R-in Aizawl lam hawia kawngsir a ding Truck a su a,

Truck hian back hnanin a hnung lam metre 50 vela thui an tawlh hnuah Truck hi a tlu a, Truck tlu hian Car hi a delh zui a ni.

Car a chuang mi pathum- Masukur Rahman (26), Sadam Hussain (28) leh Abu Khaled MD Imdadulla (19) Karimganj district, Assam mi vek te chu a hmunah thi in, tukin dar 4:30 vel khan ruang te hi lakchhuah kim an ni a.

Midang pahnih - Ruhul Islam leh Saharul Islam Talukdar (31) Hailakandi District, Assam te chu dama lakchhuah niin, Kolasb district Hospital-ah hruai an ni a, first aid pek an nih hnuin chhuah tir lehngal an ni.

Mithi te hi Kolasib district Hospital-ah postmortem an nih hnuin vawiin chawhnu khan an khua panpui an ni a. Mita hmutute sawi danin, Truck dinglai sutu Car hi a tlan chak hle a ni.

Chetsualna thlenna hmunah hian Kolasib Police leh Kolasib Sub-Hqrs YMA hruaitute an thleng nghal a, truck tlu pawh hi JCB hmanga tun a ni.

Thudawn dan in, Car-in truck a sut lai hian, Truck ah hian handiman chiah chuangin a muhil a, thil ri bur hria in, truck hi a lir zui nghal a, a brake rap mahse a din theih loh avangin he vanduaia hi a thleng zui ta a ni.

Truck hian eitur bakah leitha bag 80 vel a phur a, leitha hi Dan lova phurh a nih avangin Kolasib Police ten man in, Court-ah thawn a ni ang.

<><><>

MPCC

Mimal hlawkna tura vantlang phur lirthei khalhtute eizawna tichhe thei application hmang lui lo turin Congress Party chuan Mizoram Sorkar a hriattir.

Hemi chungchangah hian thuchhuah siamin Congress Party chuan Taxi khalhtute leh Auto Rickshaw khalh tute chu he application hi an zawm duh lo a nih chuan Taxi permit sorkarin a pek chhuah belh ang, tia a vau ta mai chu hriatthiam harsa an ti tih an sawi a, Congress Party chuan ngun taka a zirchian hnuaah he Mizo Taxi Apps hman tura thupek chhuah chungchangah Transport Minister leh Apps siamtute inkarah puanhnuai thil a awm ngeiin a hria an ti.

Congress thuchhuah chuan he application hman a nih tur chungchangah State Transport Authority in Quotation leh Tender chhuah miah lova Firm thar lam tak, sulhnu leh tawnhriat la nei miah lo MoU a sign pui mai chu dan bawhchhiatna a nih bakah mipui pawisa eirukna atana kawngka zau tak hawna niin an hria an ti a. He apps hmangtute atanga chhiah (GST) lak telna tur a nih avangin Assembly House-a MLA te rel tur emaw Cabinet Meeting in a rel ngei tur a nih laia chutiang pawh awm lova State Transport Authority in an thuneihna bakah hma an la hi ram dan zahlohna leh mimal hlawkna tura uchuak taka induhsaknaah Congress Party chuan angai nghet tlat a ni, an ti.

Puan tawh angin, Mihring phur chi sumdawna lirthei chi thum-four wheeler taxi, two wheeler taxi leh auto rickshaw te hman tura duan Mizo Taxi App chu nimin khan Transport Minister Pu Vanlalhlana'n a tlangzarha, hetihlai hian passenger phur lirthei intelkhawmte erawhin an dodal zui zel.

Mizoram Taxi Assn, Aizawl Two Wheeler Taxi Assn leh Aizawl District Rickshaw Owners Assn te chuan sorkarin ruahmanna an siam hi an duh loh thu leh Mizo Taxi application-ah inziak lut lo turin an member te an lo chah tawh a, hemi chungchangah hian Two Wheeler Taxi Assn President Pu Lalhmunmawia chuan hetiang hmalakna lian tham a awm dawn anih chuan tuna an rate hman lai mek 2024 a mi chu ennawn sak hmasa se an duh tih a sawi a, an duh loh na lai pawh STA-ah te, Minister-ah leh lehkha pawh vawi-3 an thehluh tawh thu a sawi a ni. State Transport Authority (STA) hriattirna tihchhuah-ah Mizo Taxi App-a inziah luh hun tawp thlenga inziaklut an tlem a, Mizo mipui a phuhruk loh chuan Mizo Taxi App hmanga tlan tur permit pek chhuah an tum thu an lo sawi tawh a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

PM Modi

Prime Minister Narendra Modia leh Japan Prime Minister Sanae Takaichi te chuan vawiin khan Annual Summit ah India leh Japan inkara thawhdunna hrang hrang an sawidun. Hruaitu pahnihte hian eibar zawinna leh energy lama intodelhnate, damdawi,ralthuam leh AI lama inremna chungchang an sawidun a. Thuchhuah intawm an siamah Prime Minister Modia chuan tunlai khawvelah chuan inrintawinna chu thil hlu ber anih thu sawiin India leh Japan thawhdunna chuan hun rei tak fiahna a paltlang tawh a ti a. India leh Japan chu khawvela eibar dinhmun tehna kawngah ram lian pahnih an nih thu sawiin Indo Pacific him tak leh zalen taka siam chu an ngaih pawimawh anih thu a sawi a ni.

Japanese Prime Minister Takaichi hian nizan khan ni thum cham turin New Delhi a lo thleng a. Prime Minister anih hnua India a lo tlawh hmasak ber a ni.

<><><>

VB G RAM G

Union Minister for Rural Development leh Agriculture & Farmers' Welfare Shivraj Singh Chouhan chuan Viksit Bharat – Guarantee for Rozgar and Aajeevika Mission (Gramin) [VB-G RAM G] Act, 2025 chuan hna thar siamnaah kawng thar a siam dawn a, thingtlang khawsak a tihchangtlun bakah hmasawinna tam tak a thlen dawn a ti. Union Minister Shivraj Singh Chouhan leh Andhra Pradesh Chief Minister N.Chandrababu Naidu te chuan vawiin khan VB-G RAM G Act hi hman turin Andhra Pradesh-a Tirupati district-a Mukkavaripalle ah an hawng a. Thusawiin Pu CHouhana chuan he scheme hian a tum ber chu mi rethei kuthnathawk tumah hmaih awm lova hna thawh tur pek anih thu a sawi a. He scheme rawn tichhuak thu Prime Minister Modia fakin tunhmaa ni 100 inhlawhna kha ni 125 ah tihpun a ni tawh a ti.

<><><>